



## Onder de seringepolle

*Een verhaeltien van Roely Bakker*

Hee, wat zit daor now in et grös onder de seringepolle?

Et is bruun, et het veerties, een snaeveltien en twee kraalogies.

Och, 't is een voegeltien. Een jong voegeltien mit een rechtopstaond stattiën.

'Pie-wiet, pie-wiet,' ropt et. 'Waor is mien lekkere waarme nussien? Waor bin mien bruurties en zussies?

Pie-wiet, Pie-wiet.'

Et voegeltien hipt wat henne-weer-denne.

Hoe zol et daor telane kommen wezen?

Uut et nussien valen misschien?

Och, kiek toch es!

Hogerop in de polle zitten nog meer van die kleine dinkies.

Hiel hoge in de struken zitten de oolden te kwetteren.

Ik daenke dat de jonkies leren moeten om te vliëgen.

Mar dan? Inienen ...

Oe, pas toch op voegeltien!

Daor komt Floris, de zwatte katte. Staorigan sloept hi'j deur et lange grös. De dikke stat zwaait op-en-daele.

Hi'j kikt strak naor Pie-wiet.

Slikkebekkende komt hi'j almar dichterbi'j.

Mem en heit Doempien kwetteren zo hadde as ze kunnen.

Ze vliëgen ronties boven de katte.

'Komop, Pie-wiet. Vliëgen. Vlieg dan vot.'

Oe, oe. As dit mar goed oflopt.

Floris zet de rogge in de bocht, nemt een sprong en ...

Woesssj, et kleine voegeltien zit halverwegens de seringepolle.

Hè toch, gelokkig.

Floris blaost van lelkens.

Daor is dat verhipte voegeltien him te vlogge of.

Mar waacht mar, waacht mar...

Floris, de dikke zwatte katte  
ligt in et schaad van de hede te  
bekommen.

In de hede zit een koppeltien  
musken. Ze tsjilpen an ien  
stok deur en rammaaien deur  
de hede.

Zo vliegen ze et gröskaampien  
in, pikken d'r wat omme en  
zoef, zo zitten ze weer in  
de hede.

Floris dot lui ien oge los.  
Zal hi'j?

Nee. Hi'j het gien nocht om  
op musken te jaegen.

Hi'j het krek et bakkien mit voer leeg eten.

Vandaege was et meraokels lekker spul.

Neffens et vrouwgien was et een ni'je smaek.

'We moe'n mar es kieken aj' dit ok lussen,' zee ze, 'et is wat ni'js. Vispaté.'

Now en of dat smaekte.

Hi'j het et tot de laeste krummel opmaekt en doe et bakkien wel tien keer uutslikt.

Zo lekker was et.

Die musken blieven d'r wel.

Floris gaot eerst een knippertien doen.

'Poes, poes, waar bi'j?'

Floris schrikt wakker. Da's zien baosien die him ropt.

'Floris, jonge, kom es gauw.

Moej' es kieken wat ik veur je jaordag kocht hebbe.'

Jaordag? Is hi'j jaorig?

Et zal wel.

Mar wacht es even, zollen ze wat lekkers veur him hebben?

Toch mar even kieken.

Beni'jd lopt hi'j op huus an. De neuze in de locht.

Hmm, hi'j rokt nog niks. Och, zien bakkien is ok nog leeg.

Snorrende dri'jt hi'j d'r omme toe.

'Nee Floris, ie kriegen niet meer. Ie bin dikke zat. Kom es hier.'

Hi'j wodt oppakt en dan...

Oe grote schaande, dan krigt hi'j een baantien om de nekke.

Een baantien mit een bellegien d'r an.

'Zo, now heuren de voegelties je ankommen.

Ie hoeven gien voegels op te vreten, ie kriegen hier meer as genoeg.'

Floris blaost en klauwt van lelkens. Is hi'j daor reer veur de gek holen.

Reken ie op wat lekkers en dan kriej' zoks.

Zollen ze niet weten dat voegels vliegen kunnen, mar katten niet?

## In et schaad van de hede

*Een verhaeltien van Roely Bakker*



# Een viever in de tuun

*Een verhaeltien van Roely Bakker*

Buurman het een viever in de tuun.  
In die viever zwemmen vissen.  
Hiele dikke, gooldkleurige vissen.

Floris, de zwatte katte staot op 'e raand  
van de viever.

As hi'j mit een veurpote op et waeter tikt,  
kommen de vissen naor de oppervlakte.  
De bekkies wied eupen.  
Ze bin d'r wisse van dat ze wat lekkers kriegen.

Vissen, daenkt Floris, zollen die krek zo  
smaeken as vispaté?  
Ik moet zien da'k zoe'n mooie, dikke vis  
te pakken kriegen.

Hi'j rekt him uut en slat mit de veurpote...  
Mis.

De spetters vliegen him om de oren en de vissen duken naor de bojem.

Ik zal ze kriegen, daenkt Floris.  
Ik tikke weer op et waeter en as ze dan naor boven kommen, dan spring ik d'r in en griepede d'r iene.  
Zachies ruurt hi'j in et waeter.  
Kom mar vissies, kom mar.  
Nog een tikkie en dan ...

Floris nemt een sprong, en ploons. Koppien onder.  
Brr. Nat, koold en waor hi'j ok kikt, gien vis te zien.  
Ja, beneden op 'e bojem, mar zo diepe dust hi'j et waeter niet in.

Mit muuite klimt hi'j op 'e kaant.  
Schuddet et waeter wat of.  
Zocht mit slepende stat een plakkien in de zonne.  
Weer opdreugen en waarm wodden.

Vissen kun niet vliegen zoas voegels, mar ze bin al krek zo lastig om te vangen.



# In de oolde pereboom

*Een verhaeltien van Roely Bakker*



In de oolde pereboom, krek op et plak waar de boom him in twienen splist, zit een holte.  
Daor het et wiefien van een bi'jebiertertien mit grös, mos, geitehaor en veerties een nussien in bouwd.  
Doe et nussien klaor was het ze d'r acht eigies in legd.  
Mooie witte eigies mit rooie vleckies.  
Een week of tweeje laeter kwammen daor acht piepkleine jonkies uut.

Heit en mem bi'jebieter vliegen of en an om et jonge spul te voeren.  
De roepen, pieren, spinnen en moggies bin niet an te slepen.  
Dat drokke gedoe vaalt Floris, de dikke zwatte katte, op.

Hi'j lopt es een rontien om de boom.  
Kikt verlekkerd omhogens.  
Een nust vol lekkere happies, dat lacht him toe.  
Hi'j nemt een anlopien, springt en ... Bats.  
Oe heden, hi'j komt nog niet halverwegens.  
Mit de veurpoties wrift hi'j over et snutien.  
Zoe'n boom is had, aj' d'r tegenan springen.  
Mar even bekommen.  
Doukies mar weer perberen.

Een schoffien laeter klimt hi'j tegen de stamme op.  
Now hebben heit en mem de katte in et vezier.  
Ze kwetteren van wonder en geweld.  
As hi'j te dichte bi'j et nust komt, zetten ze de anval in.  
Ze vliegen ronties en duken naor onder.  
Pik, pik, pik. In de kattedekop.  
Van schrik vaalt Floris op 'e grond.  
Dri'jerig kikt hi'j naor de beide voegelties, die now hoge in de boom een lietien fluiten.  
Die verhipte voegels.  
Bin ze him te slim of.  
Mar waacht mar, waacht mar...